

Mud Volapüka

Nüm 51

7 prilul 2017

Bukemaboed

Lekoned-mär yutopik
„Ventürs hiela ‚Nenolikan‘ e flenas omik“
fa hiel „N. N. Nosov“

Kapit balid. Lövikans di Florazif.

Tö zif märük semik lövikans lödons. Nemoy etanis lövikanus, bi äbinons vemo smalik. Lövikan alik älabon geiloti mö ze küg smalik. Äbinos vemo jönük pö zif onas. Zü dom alik flors glofons: bälieds, kamomils, taraks. Uso igo süts pänemons me nems floras: Kampanula=süt, Kamomila=lael, Blöväta=golöp. E zif it pänemon as Flora=zif. Ätopon len bluk. Bluk at lövikans pänemons as Küga=flumed, bi su jols bluka kügs mödik äglofons.

Po [votaflanü] flumed fot äbinon. Lövikans äjafons botilis de biadajal, älovebotons love flumed ed ägolons ini fot ad plökön bälis, garidis, nötis. Äbinos fikulik ad plökön bälis, bi lövikans fe äbinons smaliks; ab pro nöts ga ämutoys bexänön bimüli geilük e zuo keblinön saovi. Lövikan nonik äkanonöv desleitön nöti me nams: änedos ad saovön onis. Garidis koo äsaovoys. Fisaovoys garidi ebo len vulil, täno fidäsaovoys oni ad dils e tiroys dilis balato domio.

Lövikans äbinons neleigiku: anikans pänemons hicililu, ab votikans - jicililu. Hicilils ai älenlaboms u bliti lunik love jukem u blitili brefik ko blitipolians, ab jicilils



älöfofs ad lenlabön juüpili binü stof levielik.

Jäfön me herem okik äneplitos hicililis, e klu herems omas äbinons brefikus, ab herems jicililas äbinons lunikus: ti rivölo zönüli. Jicilils älöfofs vemo ad jafädön heremis jönik distöfik: ävivofs heremi ad flökot lunik ed älüvivofs tanedilis ini flökot, ab älenlabofs tufotis pö kap. Hicilils mödik äpleidoms vemo, das äbinoms hicililus, e tio no äflenoms kol jicilils. Ab jicilils äpleidofs, das äbinofs jicililus, e koo no ävilofs flenön kol hicilils. If jicilil seimik äkolkömoföv hicilili pö süt, tän, eküpölo etani büo, sunädo älovegolofs süti votaflanio. Ga ädunof somiko fe verätiko, bi bevü hicilils suvo ädabinoms, kels no äkanoms ebo beigolön jicilili: ab efe äsagom ofe bosu neplitik, igo äjoikom u nog badikumo, das ätirom len flökot. Fe hicilils no valik äbinoms somiku, ab atos no logamovon demü logot, klu jicilils äcedofs, das binos gudikum ad lovegolön süti büo e no dajonön oki ön kolköm. Demü atos hicilils mödik änemoms jicililis lucäd=an=il=u=s [kels lucädons]: vö! datikoy vödi fe kion!; ab jicilils mödik änemofs hicililis zuniälanus e me zanädanems nofik votik.

Reidans anik sunädo sagonsöv-la, das atos valik bo binon magälöfu, das lövikans somik no dabinons pö dabinöp. Ab nek steton, das etans dabinons jenöfiko. Pö jenöföp binos semo, ab pö zif märük binos go votiko. Valikos jenon pö zif märük.

In domil semik tö Kampanulasüt hicilil-lövikans degmääl älödoms. Cifu etanas äbinom hicilil-lövikan nemü ‚Nolikan‘. Etan pänemom elu ‚Nolikan‘ demü nols omik vemo mödik. Änolom mödikosi, bi äreidom bukis distöfik. Buks at äseatons pö dom omik valöpo: su tab, dis tab, su bed ä dis bed. Pö cem omik plad nonik ädabinon, kö buks no äseatons. Dub reidam bukas Nolikan ivedom vemo visedikü. Klu valikans älobedons ed älöfons omi. Älenlabom ai klotemi blägik, e ven äseidom oki len taba, täno älenükom lüni len nud ed äprimom ad reidön buki seimik: tän go äsümom lü profäsor.

In domil ot sanan famik: hiel ‚Pilul=ül=an‘< älödom, kel äsanom lövikanis ta maläds valik. Älenlabom ai mänedi sanavik vietik ed älenlabom su kap luhäti vietik ko kvat. Id is cinädan brafik: hiel ‚Skrub=ül‘< älödom kobo yufan okik: ‚Lebuon=ül‘. Hiel ‚Jueg=an Jueg=al=an Sirup=ül‘ [Juegan binon pösodanem, Juegalan – fatanem, Sirupül - famülanem] älödom is, kel äfamom demü etos, das äplidom vemo karbatazüdavati



Nolikan



Pilululan

ko sirup. Äbinom vemo plütiku. Äplitos omi ven pänemom me pösodanem e fatanem, ed äneplitos omi ven pänemom te as ‚Sirupül‘. I yagan: hiel ‚Glöb=ül‘ < älädom in dom at. Älabom dogili smalik: el ‚Bul=ül‘ < e güni jütiköl me buons. Älädoms is pänan: ‚Kölama=rüd‘ <, musigan: ‚Lür‘ ä hicilils votik: ‚Spid=ül=an‘, ‚Mur=ül=an‘, ‚Seilan‘, ‚Bastet=ül‘, ‚Perön=ül=an‘, blods tel: ‚Ba=ül=an‘ e ‚Bo=ül=an‘. Ab sevädikünu bevü etans äbinom hicilil nemü ‚Nenolikan‘. Pänemom elu ‚Nenolikan‘, bi änomom nosi.

Nenolikan at älenlabom häti klilablövik levielik, bliti klilayelovik e jiti rojanik ko särvigakravat grünik. Valemo älöfom kölis levielik. Edekölo oki so levieliko äsvo papag, Nenolikan äziglibom ve zif ünü del lölik, älautom ludatikotis märük distöfik ed äkonom valikanes. Zuo, ai älenofom jicililis. Klu jicilils, eküpölo büo jiti rojanik omik, sunädo ägeflekofs oki ed äklänedofs oki pö doms. Nenolikan älabom fleni nemü ‚Flab=ül‘, kel älädom pö Bälieda=süt. Nenolikan äkanom spikodön Flabüli ünü düps mödik. Äzanoms kol od ze teldegna a del ed äpüdoms otna a del.

Mu pato Nenolikan äfamükom oki pos jenot semik.

Balna äspatom ve zif ed efiglibom pö fel. Nek äkomon zi. Dü tim ot mayula=cäf äfliton. No eküpölo Nenolikani, cäf ekobojokon ta om len kapabäk. Dub atos Nenolikan ädaivülom sui glun. Ün tim ot cäf efidefliton ed enepubon pö fag. Nenolikan elöjutom, azilogom ad tuvön utani, kel eflapon omi. Ab nek äkomon zi.

„Kin eflapon obi?“, Nenolikan ätikom. „Ba, bos efaon-la löpao?“

Elölogom, ab nos äkomon löpo koo. Te sol ästralon tulitiko love kap Nenolikana.



Skrübül e Lebuoniil



Sirupül e Glöbüil ko Bulül



Kölamarüd e Lür



Murülan e Spidülan

„Klu bos e falon se sol sui ob“, Nenolikan es ludom. „Bo, dil edebrekon se sol ed eflapon obi len kap.“

Eprimom ad lomiovegön ed ekolkömom sevädani nemü: hiel ‚Glät=ül=an‘.

Glätülan at äbinom stelavanu famik. Äfägom ad jafädön gretükamaglätis de glätajebis fladas pebreiköl. Yegs difik äjinons gretikum kü älelogom onis da gretükamaglätis. Glätülan ijafädöm de gretükamaglätis anik at leskopi gretik, da kel äkanoy lelogön muni e stelis. Kludo ivedom stelavanu.

„Lilölös, o Glätülan“, Nenolikan esagom etane. „Tikodolös jeni: diled idesleitikon se sol ed iflapon obi len kap.“

„Rö! o Nenolikan!“, Glätülan asmilom. „If diled idesleitikonöv se sol, tän ideipedonöv oli ad platot. Ga sol binon vemo gretiku. Binon gretikumu ka tal lölik obsik.“

„Nö“, Nenolikan egesagom. „Cedü ob sol no binon-la pluikum ka boved.“

„Te jinos pö obs so, bi sol stadon vemo fagoto de obs. Sol binon glöpü lehitik gretik. llelogob atosi me leskop obik. Ifi diled nemu smalik idesleitikonöv se sol, tän idistukonöv zifi lölik obsik.“

„Ö!“, Nenolikan egesagom. „No äsuemob, das sol binon so gretiku. Tevobös ad konön obsikanes: ba nog no sevons atosi. Ab ga oküpedolös soli me leskop olik: üf mögädo ut fe binon-la slitodiku!“

Nenolikan eprimom ad lomiovegön ed äkonom valikanes, kelanis äkolkömom pö vegam:

„O flenädans, sevols-li kisiku sol binon? Ut binon gretikumu ka tal lölik obsik. Ekö! kionu binon! Ed, ekö!, o flenädans, diled idesleitikon se sol ed ajuton ebo lü obs. Suno ufifalon ed udeipedon obis valik. Dredö! kion ujenon! Ekö! tevalsös lü Glätülan ad dasäkön.“

Valikans äsmilons, bi äsevons, das Nenolikan äbinom luspikanu. Ab



Perönülan, Seilan e Bastetül



Nenolikan, Baiülan e Boülan

Nenolikan erönom domio ed avokädom:

„O flenädans, savolsöd oki! Diled ajuton!”

„Diled kinik?”, säkoys ome.

„Diled, o flenädans! Diled idesleitikon se sol. Ubufon suvo ed obs valik upäridikobs. Sevols-li kisiku sol binon? Ut binon gretikumu ka tal lölik obsik!”

„Magälol kiosi!”

„Magälob nosi. Glätülan esagom atosi. Ilelogom [atosi] me leskop okik.”

Valikans esejutons lü yad ed eprimons ad lülogön soli. Älülögons, älülögons, jüs drens eprimons ad deflumön se logs. Eprimos ad jinön valikanes demü bleinükam, das sol vo binon slitodiku. Ab Nenolikan ävokädom:

„O valikans, savolsöd oki! Mifätö!”

Valikans eprimons ad päkön dalabotilis okik. Kölamarüd ekesumom kölamastöfis e köfi okiks, Lür – musigömis okik. Sanan: Pilulülan < äzijutedom pö dom lölik, dasukölo tröki sanavik, kel imoikon seimöpo. Bastetül egleipom gumajukis e reinajelömi, ed igo emorönom da leyans, ab sunädo vög Nolikana etonon:

„Takedö!, o flenädans! Nos badik dabinon. Vo-li sevols, das Nenolikan binom luspikanu? Imagälob atosi valik.”


„Imagälob-li?”, Nenolikan avokädom. „Ekö!, lütevolsöd lü Glätülan ad dasäkön.”

Valikans erömons lü Glätülan, e täno eklülädos, das Nenolikan veräto iludatikom valikosi. Kio droliko äbinos! Valikans äsmilons dö Nenolikan ed äsagons:

„Stunobs kikodo äkredobs oli!”

„Ga it stunob!”, Nenolikan egesagom. „Ga it efikredob oki.”

Ekö!, kio=bisariku Nenolikan at äbinom.



Reidolsös fövoti konota pö nüm fovik.